

14
DEO OPTIMO MAX.

UNI ET TRINO,

VIRGINI DEI-PARÆ, ET S. LUCÆ,
Orthodoxorum Medicorum Patrono.

QUESTIO MEDICA,

QUOD LIBETARIIS DISPUTATIONIBUS,
*manè discutienda in Scholis Medicorum, die Jovis quarto mensis
Decembris, Anno Domini M. DCC. XLIX.*

M. LAURENTIO FERRET, Doctore Medico, Præside.

An in acutis diætâ è solis vegetantibus?

I.



QUI velociter, & cum ægrotantis periculo decurrunt morbi, vulgò acuti nuncupantur. Huc pariter referuntur, & vehementissimæ illæ febres quæ totum corpus miserè depascuntur, & illæ quæ, in aliquam corporis partem sæviente morbo, nunc pleuritidem, nunc peripneumoniam, nunc alios inflammatorios comitantur affectus. Cum porrò tantam œconomiam animali labem inferant, cum immanibus adeò totam subvertant sanitatem symptomatibus, acrior contrà insurgit natura, & obstantia validiùs impellit repagula. Hinc nunquam aliàs naturæ cum morbo lucta vividior. In chronicis verò natura debilioribus armis instructa, materiæ morbificæ coctioni impar evadit, aut eam tantummodò lentis attenuat ictibus, quam in acutis, viribus in unam dimicationem collectis, eodem impetu proterit. Si in acutis quibusdam, ut soporosis affectibus, vivida hæc non deprehendas naturæ conamina, majus inde horum meritò deduxeris periculum. Sic, notante Hippocrate (a), apoplectici intrà septem dies intereunt, nisi febris eos prehenderit. Cum ergò præcipuæ sint in sanandis acutis affectibus naturæ partes, satis patet quantum in viribus conservandis, quantum in accurato diætæ regimine operæ sit impendendum. Solâ scilicet diætâ plurimos morbos, eosque maximos vinci posse scribit Hippocrates. Ne te igitur Asclepiadis error decipiat, qui vires ægrorum fame sitique convellendas imperat, infirmiora viscera pleniori cibo postea obruens. Tenuem semper & humidum febricitanti cuicumque, at ab initio plenior, in statu & exacerbationibus tenuissimum, in declinatione sensim adauctum victum, cum Hippocrate ægrotantibus exhibendum jube. Dum scilicet in exsuperante materiâ morbificâ debellandâ vires occupantur, de cibo detrahendum. Quò plùs virium, minùs morbi superest, eò plùs alendum, & contrà. In definiendâ tamen ciborum quantitate, morbi diuturnitatis, ægrorum ætatis, temperiei, & consuetudinis habenda ratio. Si verò rectam ciborum inquirenti quantitatem, tot sint observandæ cautiones, momenti sanè multò majoris, altiori que digna indagine qualitas in iisdem requisita. Ad cujus notitiam solus ille perveniet, qui priùs in hisce morbis statum corporis, & humorum diathesim sedulò perpenderit.

I I.

PUTREDINEM latè in omnibus morbis acutis dominari, paululùm sive eorum causas, sive etiam effectus perscrutando, facilè detexeris. Sæpe enim putridum miasma, à stagnanti in ventriculo saburrâ absorptum, omnem sanguinis massam infecit, & subitâ labe per omne corpus diffusâ, totam contaminavit œconomiam animale. Interdum per aëra vagatur, & afflatu putrido urbibus sæpe & regionibus pestilenciales febres, & omne putridorum morborum genus invehit. At sæpiùs à calido humidoque

(a) 2. De morbis. Ic. aph. § 1. Sect. VI.

aëre retenta excrementa corporis insensilia, intrâ propria vasa corrumpuntur, & brevî putredinem inducunt. Quot à tetrâ hâc lue morbi ex acutorum profapiâ oriantur, satis constat. Sed plures adhuc tanquam effectus excipit putredo. Pluribus enim acutis febris insidet. In statu porrò naturali, motu vitæ necessario rapti humores, in alkalinam brevi tempore vergerent acrimoniam, nisi huic præcavendæ aptissimus, novus & blandus perpetuò suppeteret chylus. Hoc satis testantur è sanguinis massâ post diuturnum jejunium secreti humores, ut saliva, urina, &c. Si ergò vividior fiat humorum motus, intensior vita, major inde meritò pertimescenda alkalescentia. Hanc in acutorum plurimis adeste putredinis causam, satis probat fervens quo ægri plerumque deuruntur calor, nova putredinis ipsemet origo. Calorem præcipuum esse putrefactionis instrumentum, nemo non novit. Si de pravâ hâc humorum qualitate sanius adhuc ferre velis judicium, excreta consulas. Urina falsa & acerrima non dubias promptæ in alkalinam indolem proclivitatis notas præ se fert. A magnis quas in vesicâ procreat irritationibus, frequentior & parcior ipsius emissio. Eandem bilis qualitatem demonstrant, Medico sæpissime negotium facessentes biliosi vomitus, biliosæ diarrhœæ. Major adhuc in eo posita est alkalescentiæ ratio, quòd tam acria excrementa, partibus erethismo contractis, intrâ sanguinis massam sæpenuerò detineantur. Quot porrò putredinis causæ! Quapropter nil mirum, si è cadaveribus hisce morbis peremptorum tetra adeò spargatur mephitis, plurimaque viscera putrefacta reperiantur. Nec te moveat, quòd sæpe in acutis inflammatoriam humorum incusent densitatem, quæ vi solidorum adauctâ, vividiori calore, tenuioribusque diffatis partibus, in causò præsertim, & fervidissimis æstivis febribus observatur. Ut enim inflammatio in gangrænâ, sic inflammatoria sanguinis densitas in putredinem facillè definit, ubi omnia vi vitæ intensiori ita compacta fuerint fluida, ut jam oriatur immeabilitas, & post rapidissimum motum, liquido quies & stagnatio contingat. Hanc verò summè metuendam, omni ope atque operâ prævertendam, satis indicat anxietas illa proximæ immeabilitatis prænuntia, quæ hisce morbis adeò familiaris, Hippocrate Boerhaavioque notantibus, deprehenditur. Medico itaque in his affectibus incumbit, pravam humorum qualitatem emendare, æstum compescere, benignèque viscositatem inflammatoriam resolvere. Diætâ ergò acescens, refrigerans, & resolvens præ cæteris eligenda.

I I I.

E Duplici tantum regno suppeditatur alimenti materia, vegetabili scilicet & animali. Minerale condimentum largitur, non utile nutrimentum. Id in materiâ nutritiâ necessario requiritur, ut in nostram possit alterari substantiam. Porrò perpetuò mutari, novas perpetuò formas induere, solis animantibus æquè ac vegetantibus concessum. Per longam annorum seriem immutata perstat mineralium compages. Solum in utroque hoc regno mutationum quarumcumque principium, pars mucosa. Sola ergò & nutritioni materia. Præ cæteris igitur nutritiâ pollent facultate, quæ copiosorem mucaginem præbent, ut graminea, farinacea, quæ subdulci visciditate mucidum produunt. Quamvis mucida ex animali & vegetabili regno deprompta, alibili virtute prædita sint, ingens utrorumque diversitas. Quæ tamen omnis in majori minorive principiorum ea constituentium posita est alteratione. Quædam vegetantibus aluntur animantia, plantivora ideò dicta. Hæc aliis animalibus ferociori donatis indole carnivoris dictis, alimentum præbent. Omnia denique ab homine eruditâ ingluvie indiscriminatim vulgò usurpantur. Id omne cui nutriendi munus incumbit, plurimas antea mutationes experiatur necesse est. Cum ergò vegetantia præbeant animalibus alimentum, primum ab ipsis materiæ nutritiæ rudimentum mutuamur; animalia verò quæcumque mutationes vegetabilibus majores experta esse luculenter patet. Verum quo plùs corpus quoddam alteratur, eò magis ipsius attenuantur moleculæ, eò laxior fit principiorum nexus, & ad sui destructionem, putredinem nempe, propiùs accedit. Magis ergò vegetantibus animantia ad alkalinam vergere acrimoniam, suadet ratio. Idem docet chemica analysi, è prioribus, quibusdam tamen exceptis, acida, è posterioribus alkalia volatilia, olea foetidissima educens. Si de effectû mutationum quas subeunt vegetantia, priusquam regnum ingrediantur animale, certior adhuc esse velis, semimutatum alimentum contemplare: plantivororum animalium lac inspice. In eo partim vege-

tabilem, partim animalem deteges indolem. Serum enim lactis vegetantium ritu spontè acescit. Secùs autem de parte caseosâ. Hæc enim chemico subjecta examini, non jam acidum spirat, sed in alkalinam spontè degener indolem, animale quid sapit. Quod huc usque docuit ratio, chemica comprobavit analysis, quotidianis confirmatur experimentis. Carnes enim animalium in æstivis caloribus, si præsertim simul adsit aëris humiditas, intestinum pati motum, brevique putrido tabo diffluere, omnes norunt. Vegetantia contrâ, si quædam exceperis, in oppositam potius vergunt acrimoniam. Hordei, avenæ, & similium farinæ citò acescunt. Sed non eadem est omnibus animalibus ad putredinem proclivitas. Suus cuique generi servatur gradus. Sic carnivora, quæ jam ab alio subactus animali vegetantium succus alit, principiis donari tenuioribus, ut rationi, sic experimentis consentaneum est. Hinc multò citius quàm plantivora quævis putredine diffluent. Inter carnivora, quæ minor exercuit motus, minùs putredinem concipere æquum est. Hinc qui ferinâ carne, cursuque exercitâ abutuntur, salibus acidisque tanquam utili condimento cibum corrigere, brevique prosternendum erigere coguntur appetitum. Nec mirum tamen, si qui iis immoderatè aluntur putridis morbis vivant obnoxii.

I V.

CUM tantâ per se in putredinem propensione inclinent animalium carnes, quæ ex iis desumuntur alimenta, novâ præsertim partium attenuatione per ignem conciliatâ, ut in jusculis habemus, omnia alkalescentiam affectent necesse est. Si verò in animali cui creduntur denuò tenuanda, vividior motus, calor intensior, agentium organorum vis major & efficacia in novam concurrant alterationem inducendam, quantò facilior enascetur putredo. Liquet inde, quantum sæpe intempestivè exhibita animantium juscula, damnum in acutis improvisò inferant. Hinc Helmontius de diætâ cæterorum ægrorum satis parum sollicitus, febricitantibus animalium carnes & earum juscula prohibet. *Eadunt namque febrientes, quia caro, ova, pisces, & juscula facilièrum cadaverantur, ac minimè nutriunt* (a). Nil tale à vegetantibus metuendum; contrâ verò medicinale præbent alimentum. Summæ humorum acredini, occurrit ipsorum acescentia. Densitati humorum præter modum auctæ, vis leniter lubrica saponaceam præferens indolem, medetur ita efficaciter, ut nullum aliud meliùs auxilietur remedium, quàm quod ex diæteticis desumitur. Summam præterea nutrientis materiæ vim humoribus suppeditant, quæ eò nutrit magis, quò magis acrimoniæ resistit inconcussa. Hæc omnia rectâ partium se se mutuò contemperantium mediocritate, præ cæteris habet hordei prisana, quam commune omnibus acutis alimentum voluit Hippocrates. *Lentorem*, inquit (b), *habet lenem, & continuum, & suavem, & lubricum, & mediocriter humescentem, & si quid elui debet probè abludentem*. Si majus incutiat periculum, suis se se prodens nec dubiis indiciis putredo, habes unde eam efficacius retundas in aceto, cui primas in omnibus morbis quos dira afflavit putredo, rectè concesseris. Si putredini juncta se se obtulerit infelici connubio densitas inflammatoria, quin tu cum antiquo medicinæ parente, rejectis officinalibus illis titulo quàm virtute insignioribus medicamentis, ad oximel confugas. Saponaceum hoc simul & acescens è duobus vegetabilibus compositum, æstum compescere, putredinem retundere, & inflammatorios nexus solvere, ante omnia aptum est. Quòd si verò extrâ ipsam naturam medicamenta quærere nolueris, has simul junctas in horæis fructibus largietur ipsa virtutes. Lenis ipsis saponaceusque succus. Eminent etiam putredini adversa aciditas. Hinc in æstate familiares. Hinc in arentibus locis adeò vulgares. His fretus ratiociniis Boerhaavius, quantumvis in ipsum insurgerent ignari, tanto cum successu, in putridis & inflammatoriis morbis, hosce fructus usurpabat. Quid jam tantis rationum momentis, appetitum ipsum ægrotantium placeat addere? Carnes certè horrent, & è carnibus magno labore extracta juscula fastidiunt. At hordei decocta, fructus horæos, & similia avidè arripiunt.

V.

NOSTRAM opinionem quot comprobant argumenta! Ad hanc deffendendam multiplicis generis rationes, analogia, spontaneus ipsemet ægrorum appetitus videntur conspirare. Quid plura? An tibi magis in hisce rebus arrideret medicorum authoritas? Veterum & recentiorum scripta evolve. Huic semper sententiæ suffragan-

(a) Helmont. de febrib. cap. 12. N^o. 4^o pag. 772.

(b) De rat. vict. in Ac.

tem videas eorum doctrinam. Sic primus inter veteres Hippocrates, solâ hordei ptisanâ, aut ipsius cremore vel succo utebatur. Sic etiam Sydenhamus, carniū jusculis prorsus exulare iussis, hordeata, avenacea tantummodò exhibebat. Eadem hæc ubique commendat Boerhaavius. Cur ergò dubius hæres in tam felici omnium omnium ævi medicinæ principum consensu? Verum, inquis, multa morantur & assensum cohibent. Plurimis nimirum, quæ ciborum coctioni inserviunt, læsis functionibus, facilius assimilandum requiritur alimentum. Ad hoc nulla æquè instructa sunt ac animantia, utpotè quæ magis elaboratis constent moleculis, & ad nostram propiùs accedant naturam. Contrà verò vegetantia, & inter hæc præcipuè cerealia, hordeacea, avenacea, crassioribus conflata particulis, difficilius digerendum præbent alimentum. Hinc sæpissimè motu fermentationis eorum priùs attenuanda crassities, laxanda tenacitas. Hæc præterea, cum majori indigeant elaboratione, viribus ægri tam citò refocillandis imparia. Quæ etsi primâ facie aliquam rationis speciem præ se ferre videntur argumenta, facilè tamen convelli possunt. Subtilioribus & magis elaboratis constare moleculis animantia nedùm diffiteamur, de hoc ipso conquerimur. Hinc in acutis affectibus, in alkalinam tam facilè vergunt acrimoniam, pravam humorum adaugent diathesim, vividioresque passa mutationes, nutritioni nedùm inserviant, in excrementa facessunt putrescentia. A vegetantibus non fermentatis, & crudis assumptis, plurima, fateor, insurgerent incommoda. Verum fermentationis vices rectè supplet ebullitio. Hujus enim ope crebrò sibi occursantes horum mucidorum moleculæ se se collidunt & atterunt. His multum favent aquæ inter ipsorum partes incuneatio, aeris contenti vis, ipsius à calore increscens expansio. Hinc mucida attenuantur, unionisque soluto nexu, facili coctioni evadunt idonea. De hordeo ebullitionem passo sic loquitur Hippocrates (a). *In ventriculo non intumescit; cibus etiam imbecillus est, & facillimè concoquitur.* Cæterum ægrorum temperies & consuetudo, quasdam in acutorum diætâ varietates afferre queunt. Sed cum in genere, omnia vegetantium diætâ comprobent eligendam, meritò inferimus.

(a) Derat.
vict. in Ac.

Ergò in acutis diætâ è solis vegetantibus.

DOMINI DOCTORES DISPUTATURI.

M. Carolus-Ludovicus Liger.

M. Franciscus-David Herissant,
è Regiâ Scientiarum Academia
& Chirurgiæ Professor
designatus.

M. Joannes-Baptista Boyer,
Regis Consiliarius Medicus in
supremo Senatu ac in Præfecturâ
Parisiensi, Serenissimæ Cæ-
nomanensium Ducissæ Medicus
ordinarius, Censor Regius,
Regiæ Societatis Londinensis
Socius, & utriusque Pharma-
ciæ Professor designatus.

M. Joannes-Stephanus Guet-
tard, Regiæ Scientiarum Aca-
demiæ Socius, Censor Regius
& Serenissimi Aurelianensium
Ducis Botanicus.

M. Jacobus-Franciscus le Chat
de la Sourdière.

M. Bernardus de Jussieu, Regiæ
Scientiarum Academia, Re-
giæque Societatis Londinensis
Socius & in Horto Regio Bo-
tanices Prodemonstrator.

M. Natalis-Maria de Gevi-
gland.

M. Joannes-Franciscus Isez.

M. Joannes Astruc, Salubris Con-
siliarii Regii Socius, Regis Po-
loniarum Augusti, Electoris
Saxonie, dum viveret, Me-
dicus Primarius, Professor
Regius & Scholarum Profes-
sor designatus.

Proponebat Parisiis ANNA-CLAUDIUS DORIGNY, Parisinus,
Saluberrimæ Facultatis Medicinæ Parisiensis Baccalaureus,
A. R. S. H. 1749, à sextâ ad meridiem.